

I. Disposicións xerais

XEFATURA DO ESTADO

23254 REAL DECRETO LEI 19/1999, do 3 de decembro, sobre as obrigas de pagamento esixibles o día 31 de decembro de 1999. («BOE» 290, do 4-12-1999.)

A Lei 41/1999, do 12 de novembro, sobre sistemas de pagamentos e de liquidación de valores, na súa disposición adicional sexta, declara inhábil o día 31 de decembro para efectos de liquidación de obrigas nos sistemas de pagamento interbancarios, co obxecto de evita-las eventuais repercusións negativas do denominado «efecto 2000» sobre o funcionamento dos ditos sistemas na citada data.

Ademais, o Goberno, a través da Oficina de Transición para o Efecto 2000, creada polo Real decreto 1377/1999, do 27 de agosto, que coordina as accións da Administración xeral do Estado dirixidas a garantir unha adecuada transición ó ano 2000, examinou as disfuncións que poden producirse durante o 31 de decembro, como consecuencia das medidas previstas para ese día no funcionamento do sector bancario.

Co obxecto de evita-los posibles prexuízos para os cidadáns e, en xeral, para calquera persoa física ou xurídica, pública ou privada, que deba facer efectivos pagamentos en tal data, este real decreto lei establece que as obrigas de pagamento esixibles o 31 de decembro de 1999 poidan ser cumpridas sen incorrer en mora o primeiro día hábil do ano 2000.

Así mesmo, considerouse necesaria unha previsión específica para o cumprimento de obrigas coa Seguridade Social que venzan o 31 de decembro de 1999, dadas as peculiaridades da súa regulación legal e regulamentaria, polo que a aplicación xeral do real decreto lei sen salva-las súas peculiaridades provocaría neste ámbito importantes inconvenientes e disfuncións, tanto desde o punto de vista financeiro, coma na orde orzamentaria e contable, así como respecto dos actuais procesos informáticos establecidos para a xestión recadadora.

A extraordinaria e urxente necesidade requirida polo artigo 86 da Constitución para dictar este real decreto lei radica na proximidade da data do 31 de decembro e en que se considera imprescindible adopta-la medida contida nesta norma coa antelación suficiente para que teña a necesaria difusión.

Na súa virtude, en uso da autorización concedida no artigo 86 da Constitución, por proposta do vicepresidente primeiro e ministro da Presidencia, o vicepresidente segundo e ministro de Economía e Facenda, a ministra de Xustiza, o ministro de Traballo e Asuntos Sociais e o ministro de Administracións Públicas e logo de deliberación do Consello de Ministros na súa reunión do día 3 de decembro de 1999,

DISPOÑO:

Artigo único. *Cumprimento das obrigas de pagamento esixibles o 31 de decembro de 1999.*

As obrigas de pagamento que deban facer efectivas as persoas físicas ou xurídicas, públicas ou privadas, con intermediación de entidades financeiras, que sexan esixibles o 31 de decembro de 1999, cando non poidan ser cumpridas nesa data por causa non imputable ó obrigado ó pagamento, poderán efectuarse o primeiro día hábil do mes de xaneiro do 2000, sen que por iso o obrigado ó pagamento incorra en mora.

En atención ó réxime específico da Seguridade Social para o pagamento de débedas, as obrigas que teñan un prazo regulamentario de ingreso que venza o 31 de decembro de 1999, deberán facerse efectivas o anterior día hábil.

Disposición derradeira primeira. *Fundamento constitucional.*

Este real decreto lei dítase ó abeiro do artigo 149.1.13.^a da Constitución, que lle atribúe competencia exclusiva ó Estado en materia de bases e coordinación da planificación xeral da actividade económica.

Disposición derradeira segunda. *Habilitación ó Goberno.*

Autorízase o Goberno para dicta-las disposicións necesarias para o desenvolvemento e execución deste real decreto lei.

Disposición derradeira terceira. *Entrada en vigor.*

Este real decreto lei entrará en vigor o día seguinte ó da súa publicación no «Boletín Oficial del Estado».

Dado en Madrid o 3 de decembro de 1999.

JUAN CARLOS R.

O presidente do Goberno,
JOSÉ MARÍA AZNAR LÓPEZ

23255 REAL DECRETO LEI 20/1999, do 3 de decembro, polo que se adoptan novas medidas para paliar los efectos da seca nalgúns cultivos leñosos. («BOE» 290, do 4-12-1999.)

Os efectos da última seca alcanzaron algúns cultivos leñosos con repercusión moi grave en determinados ámbitos territoriais. Este é o caso da Comunidade Autónoma de Murcia, na que a ausencia de precipitacións, a falta de rega e o empeoramento da calidade da auga provocaron gravísimos danos na amendoeira, que afec-